

**RISALA YA MWENYEKITI WA TUME YA TAIFA YA UCHAGUZI
MHE. JAJI (R) MSTAAFU SEMISTOCLES S. KAIJAGE KUHUSU
UPIGAJI KURA KATIKA UCHAGUZI MDOGO WA JIMBO LA
NGORONGORO NA KATA TANO ZA TANZANIA BARA
UTAKAOFANYIKA TAREHE 11 DESEMBA, 2021**

Ndugu Wananchi;

Kama tunavyofahamu kesho Jumamosi tarehe 11, Desemba, mwaka huu, ni siku ya Kupiga Kura katika Uchaguzi Mdogo wa Ubunge na udiwani. Uchaguzi huo mdogo unahusisha jimbo la Ngorongoro lililopo katika Halmashauri ya Wilaya ya Ngorongoro, Mkoa wa Arusha.

Uchaguzi huu pia unahusisha kujaza nafasi wazi za udiwani katika kata tano (5). Kata hizo ni pamoja na Kata ya Naumbu iliyopo katika Halmashauri ya wilaya ya Mtwara, Kata ya Nyabulanda iliyopo katika Halmashauri ya Wilaya ya Nyang'wale, Kata ya Likombe iliyopo katika Halmashauri ya Manispaa ya Mtwara, Kata ya Handali iliyopo katika Halmashauri ya Wilaya ya Chamwino na Kata ya Nalasi Mashariki iliyopo katika Halmashauri ya Wilaya ya Tunduru.

Ndugu Wananchi;

Katika Uchaguzi huu, jumla ya vyama vya siasa kumi na sita (16) vimesimamisha wagombea. Kwa namna ya pekee, Tume inavipongeza vyama hivyo na wagombea waliojitokeza kushiriki katika uchaguzi huu mdogo.

Katika kipindi cha kampeni kilichoanza tarehe 16 Novemba na kumalizika hivi leo, tumeshuhudia vyama vya siasa na wagombea wao wakifanya kampeni kwa njia mbalimbali ili kutafuta uungwaji mkono. Kwa ujumla kampeni katika maeneo mengi zimefanyika katika hali ya utulivu na kwa kuzingatia maadili ya uchaguzi ambayo wadau wake wakuu, yaani Vyama vya Siasa, Serikali na Tume tulikubaliana kuyafuata. Kwa hatua hiyo, Tume inatoa pongezi kwa wadau wote wakiwemo wapiga kura na wananchi katika majimbo na kata zenye Uchaguzi kwa utulivu waliouonesha wakati wote wa kipindi cha Kampeni.

Jumla ya Wapiga Kura **147,521** walioandikishwa katika Daftari la Kudumu la Wapiga Kura watashiriki katika Uchaguzi huu mdogo na jumla ya vituo **417** vya Kupigia Kura vitatumika.

Napenda kuvikumbusha Vyama vya siasa vinavyoshiriki katika uchaguzi wa kesho kuzingatia wajibu wao wa kuweka mawakala katika vituo vyote vya kupigia, kuhesabu na kujumlishia Kura. Wasimamizi wa uchaguzi katika Jimbo na Kata wamekamilisha taratibu zinazoweka mazingira yanayowawezesha mawakala wa vyama vya siasa kufuatilia mchakato mzima wa uchaguzi.

Mawakala hao wanawajibika katika kulinda maslahi ya vyama na wagombea wao na katika utekelezaji wa majukumu yao vituoni, wanapaswa kuzingatia Sheria, Kanuni na taratibu za Uchaguzi.

Ndugu Wananchi;

Tume ya Taifa ya Uchaguzi inavikumbusha vyama vya siasa, wagombea, mawakala, wapiga kura na wananchi wote kwa ujumla kuzingatia mambo yafuatayo:-

- i) Kampeni za uchaguzi mdogo wa Ubunge na Udiwani katika jimbo la Ngorongoro na kata 5, zinahitimishwa rasmi leo. Hivyo, Vyama vya siasa, wagombea na wafuasi wao hawatakiwi kufanya kampeni za aina yeyote zaidi ya saa kumi na mbili kamili (12:00) jioni ya leo. Mambo mengine ambayo pia hayaruhusiwi kufanyika baada ya saa 12:00 na siku ya uchaguzi ni pamoja na kutumia alama za vyama vya siasa zinazoashiria kampeni kama vile vipeperushi, bendera, mavazi n.k.
- ii) Upigaji kura, katika maeneo yote ya uchaguzi, utafanyika katika vituo vile vile vilivyotumika wakati wa Uchaguzi Mkuu wa mwaka 2020.
- iii) Vituo vya Kupigia Kura vitafunguliwa saa moja kamili (1:00) asubuhi na kufungwa saa kumi kamili (10:00) jioni. Iwapo, wakati wa kufunga kituo watakuwepo wapiga kura katika mstari ambao wamefika kabla ya saa kumi jioni na hawajapiga kura, wataruhusiwa kupiga kura. Mtu yeyote hataruhusiwa kujiunga katika mstari wa wapiga kura baada ya saa kumi kamili (10:00) jioni.

- iv) Watakaoruhusiwa kupiga kura ni wale tu ambao wamo kwenye Daftari la Kudumu la Wapiga Kura kwenye jimbo na kata husika na wana kadi zao za Mpiga Kura. Hata hivyo, Tume kwa kuzingatia masharti ya kifungu cha 61(3) cha Sheria ya Taifa ya Uchaguzi, pamoja na kifungu cha 62(1) cha Sheria ya Uchaguzi wa Serikali za Mitaa, imeruhusu wapiga kura ambao wamepoteza kadi zao au kadi kuharibika kutumia vitambulisho mbadala.

Mojawapo ya kitambulisho mbadala ambacho mpiga kura anaweza kutumia ni; Pasi ya Kusafiria, Leseni ya Udereva au Kitambulisho cha Uraia kinachotolewa na Mamlaka ya Vitambulisho vya Taifa (NIDA).

- v) Mpiga Kura aliyepoteza kadi yake au kadi yake kuharibika ataweza kuruhusiwa kutumia kitambulisho mbadala, iwapo tu; atakuwa ameandikishwa kwenye Daftari la Kudumu la Wapiga Kura na jina lake lipo katika orodha ya Wapiga Kura katika kituo anachokwenda kupiga Kura. Aidha, majina yake yaliyopo katika Daftari la Kudumu la Wapiga Kura yawe yanafanana na yale yaliyopo katika kitambulisho mbadala.
- vi) Kutakuwa na majalada ya nukta nundu katika vituo vya kupigia kura kwa ajili ya kuwawezesha watu wenye uoni hafifu na wenye ulemavu wa kuona kupiga kura bila usaidizi. Kwa wapiga Kura wenye ulemavu wa kuona ambao hawawezi kutumia majalada


Tukumbuke kuwa njia kuu ya kuepuka vurugu katika chaguzi ni pamoja na wadau kuhakikisha hawajihusishi na matukio yenye viashiria vya uvunjifu wa amani. Hili litawezekana endapo kila mdau atatambua kuwa jukumu la kulinda amani ya nchi yetu ni la kila mmoja wetu wakiwemo wananchi, vyama vya Siasa, wagombea na wadau wengine wa uchaguzi.

Hali kadhalika, Tume inawakumbusha wasimamizi wa uchaguzi, vyama vya siasa na wagombea kuzingatia Sheria, Kanuni na taratibu za uchaguzi. Endapo malalamiko yoyote yatajitokeza, wahusika wanatakiwa kufuata taratibu za kuwasilisha malalamiko hayo, kama ambavyo imeelekezwa na kuanishwa katika Sheria na Kanuni za uchaguzi.

Mwisho, Tume inatoa rai kwa wapiga kura katika Jimbo la Ngorongoro na katika kata tano zinazohusika na uchaguzi huu mdogo, kujitokeza kwa wingi kwenye vituo vya kupigia kura hapo kesho, ili kuwachagua viongozi wanaowataka.

KUMBUKA KURA YAKO NI SAUTI YAKO,

NENDA UKAPIGE KURA



Jaji (R) Semistocles S. Kaijage

MWENYEKITI

TUME YA TAIFA YA UCHAGUZI